

摘藻堂四庫全書薈要

集部

欽定四庫全書薈要

集部

秋澗集卷

八十一

詳校官助教臣謝登雋



欽定四庫全書薈要卷一萬六千二百三十六

集部

秋澗集卷八十

元 王惲 撰

中堂事記

序



余自擇歲讀書頗有志於世甫及壯年彈冠應聘適際夫風雲慶會千載一遇之時荷橐載筆從事其間以至密邇論思醕酢吏務霑香紅藥之階接武雲龍之地若有所遇而大有所為也不圖爾後蹭蹬於仕

途者廿餘年回視向之鴈行而請署者川泳雲飛觸目皆是比量薄分蓋有無非命者況今日就衰謝百念灰冷有求田問舍躬耕種樹而已然覺吾習中耿耿者尚在及閱故書復得當時直省日錄觀其與諸賢聚精會神於一堂之上所以開太平之基播無疆之休者班班可見因略為修飾題之曰中堂事記庶幾閱是編者知予生長明時雖無寸補亦常饜飫邦家之光為閭里之榮也藏之篋笥固不敢以千金享

之異時有索野史求史臣中舍之所遺逸者不無一  
得于斯焉時至元二十四年丁亥歲秋九月七日前  
翰林修撰同知制誥兼國史院編修官左司都事秋  
澗老人序

中堂事記上

庚申年春三月十七日世祖皇帝即位於開平府建  
號為中統元年秋七月十三日立行中書省於燕京  
劄付各道宣撫司取儒士吏員通錢穀者各一人仍

令所在津遣乘驛赴省憚亦忝預其選是年冬十月  
至燕以三書投獻相府大率陳為學行已逢辰致用  
之意頗蒙慰獎令隨省通知計籍使綜練衆務日熟  
聞見焉一時所與遊從者畧疏如左

行中書省官四員

丞相瑪爾默資嚴厲凜然不可犯

初與趙相行六部於燕京至是就用為行

省長官

平章政事王文統字以道上都路松州人前經義進士

平章政事趙璧字寶臣西京懷仁縣人資弘偉能任大事以氣量雄天

下

叅知政事張易字仲一太原交城人

資剛明尚氣臨政善斷待士以誠忤

之不復與合

右左司郎官八員

郎中

賈居貞字仲明真定獲鹿人

金尚書右丞益謙之孫資聰敏習左氏學通諸國譯

語

郭榮祖字榮叔燕人部令史出身

度閒雅能酬應事變自大興府參謀為今

職

晉汝賢字才卿燕人班祗令史出身

資陰克有幹局

員外郎

王德容字仲寬河間將陵人部令史出身

張桐字子華燕人班祗令史出身

邢敏字公達京兆人部令史出身

都事



劉郁字父李渾源人

王德輔字良臣陳州商水人經童出身

提控令史四人

李惟寅字舜臣西京人前進士

楊文卿

珠嘉譙字和之遼東人

楊恕字誠之

左房省掾十五人

馬璘字文玉燕新城後叅知揚州行省事

樂思齊字齊賢燕人

王文蔚字仲玉東平人終濟南經歷官

劉傑字漢卿益都人

王守正字賢之新城人

宋筠字庭秀大名入

楊顥字伯榮鎮之無極人今為京兆屯田總管

楊湜字彥清鎮之藁城人

楊珍字國寶鎮之中山人

蔡玠字廷玉相州人

馮處厚高唐人

高明字柔克汴梁人

陳鼎字取新真定人

閻沂字巨川行唐人

李壑字裕卿相人

右房省掾十一人

素裕字仲寬孟州孟津人終順德總尹

李鼎字器之相人

劉作字述之柘城人

吳璧字國器邯鄲人

張安仁字壽之

宋璋字寶國柘城人

梁德佐字輔之燕人

張適字濟之平灤人

劉濟字巨川

周鼎字器之燕人

張揖字巨川覃懷人

架閣庫官二人

邊闕字正卿德興人經童出身

王和卿太原人

典吏六人

劉謙字伯益

盧慎字順之洺州人

侯康濟字仲澤真定人

趙文輝字克明燕人

王顯卿熊岳人

黃華  
侄孫

張瓚燕人

斷事官八人

阿固岱

穆蘇

吹坦八哈齊

唐古特

魯塔徹爾

其子揚戡今復為斷事官

伊尼格

阿都齊

呼圖克奉御

奏事官一人

楊仁風字文卿潞州人今為真定等路宣慰使

客省使一人

班定直字舜卿山陰人

奉使三人

孟甲字文伯太原介休人嘗奉使大理有光遠功

武茂字茂卿平定州人終鄧州統軍

劉芳字世傑中山人

知省印一人

許揖字公度太原忻州人



通譯使四人

阿哩和卓西域人

塔納特爾格

王哈喇

王炳字煥卿太原人

宣使六人

李顯祖字顯卿相人

布薩禧字仲康終涿州尹

王好禮字立夫真定人

楊特穆爾

寧澣字清甫平陽洪洞人

瓜爾佳呼圖克今為真定等路宣慰撫副使

回回譯史一人

莽珠廸音其所譯簿籍搥治方厚尺紙為葉以木筆挑書布蘇瑪勒字該寫衆事紙四隅用縷穿繫讀則脫而下之今為平章政事

書填勘合令史三人

馮崧字壽卿今為湖南北道按察副使

馬紹字子卿

李從周字文則東平人仕至東朝斷事官

掌故二人

馮渭字清甫真定人亡金松庵之子省令史出身

完顏良輔亡金省知除房令史

詳定官三人

楊威字震亨太原太谷縣人

治春秋義

張永錫字孝純太原人

周止字定夫濱州人資強毅有口多記前人利害  
事條因言事見稱在當時有足觀者都堂懸其  
卷於幕中用勸來者自是游道頗廣嘗權右司  
都事

講集太常禮樂官三人

許靖字唐臣安平人以三策終場試太常檢討

郭伯達党仲和皆東平人同講究勾當編類一切儀禮  
及祀典合祭諸神等事

肄習供衛事官一人

樊興嗣字作堅燕人

時令彩畫鑾駕一切儀仗服色等物及教習隨取到控鶴等人授供

衛大  
使

省理問官三人

蔚祚字天祿

闕

人律科出身

邊

闕

字邦傑

闕

人律科出身

張雲鵬字鵬飛燕人今任浙西憲副

掌記一人

魏初字太初順聖人

魏學士侄孫思廉之子初掌書記繼為邊關防令史令編類一切戶

口差稅宣課地畧闕塞等事宣課自領省立額幾何迄今增益幾何餘皆類此

檢法兼緣堂一人

沈侃字和卿大名入法律出身終陵州同知

堂厨局長一人

張綽爾齊

省暨二人

元鐸字振之獲呂人

楊庸字君卿燕人

鑄印局官三人

劉淵字仲廣濟南人劉狀元子

劉驥字思齊通州人

前進士劉晉德新子

王利用字國賓大都人

交鈔提舉司官三人

張介字介甫燕京人部令史出身

梁闕字秀實燕人

王煥字紹明又有鈐紙房  
織造銀貨局印造局

元寶總庫官一人

李元字唐卿河南緱氏人前進士第王鶚榜

權貨司官二人

郭儀字宜之真定人部令史出身

王諤字諤臣燕人



萬億庫官一人

魏祥卿

學士任

交鈔庫官二人

高澤字濟天平陽人

路

闕

字子敬路州人

應辦供頓官四人

郭汝梅燕人終南京總管

闕

李瑞字天祥潞州人吏員終襄垣縣尹

列省聽任人員十一人

康天英字國才相人

胡祇通字紹聞武安人終山東按察使

李謙字受益今翰林侍讀學士

劉宣字伯宣太原忻州人

韓璿字寶之平陽人

馬天驥字彥良滋州人

陳祥字君祥大名入

張煥字彥明濟南人

張適祖字仲賢順天人

白俞字舜俞

吳讓字謙甫

時官至省者士人首以有無生理通曉吏事為問及取  
要所業文字蓋審夫資身之術或能否從事及手筆何

如耳又擬以士人克省掾吏負補兩部令史東平士夫  
李謙聞之不欲吏辭去

劉仲祥東平人

亦係到省  
聽任人負

時堂議擬令諸掾巾裹一衣皂服仍佩書袋於上或曰  
書袋廢已久驟用恐駭觀聽若巾裹服止皂褐二色儘  
表於衆遂行焉

是月勅建葫蘆套省倉落成號曰千斯時大都漕司勸  
曹辰等倉歲供營帳工匠月支口糧此則專用收貯隨路

儲漕糧科祇修應辦用度及勘會亡金通州河倉規制  
自是漕船入都常平救荒之法以次有議焉諸投下五  
戶絲料譯語曰阿合塔木兒自來就徵於州郡堂議云如此是恩  
不自上出事又不一於政體未便奏准皆輸大都總歲  
每歲令各投下差官赴省驗數關支

其法每戶科絲二十二兩四錢二戶計該絲二斤一  
十二兩八錢其二斤即係內官正絲內正絲色絲各  
半外將每戶贖餘六兩四錢贖至五戶滿二斤數目

付本投下支用謂之二五戶絲以十分論之納官者七分投下得其三焉

十一月甲子朔二日乙丑時夜禁甚嚴慮公幹有礙令有司置夜行白油木牌雖官府貴近非此不敢輒出往時一切無賴等人侵暴不法之事盡行斂息

時應乘驛馬皆從省府給降劄子堂議亡金時馬劄子上畫墨桃紀數今宜印以墨馬遂用之如三匹者三馬五匹者五馬仍用省印以傳其上

癸酉濟南宣撫司申宣撫副使王磐

先生字文炳永年人前進士第道號

鹿菴年七十致仕

棄職去相府以惲係王幕生令作書云省留

之乃執覆曰鹿庵先生人品高邁宜膺大受不可處之人下雖招之恐終不應不若從其所好遂止

初行六部所會東平路民賦帳冊或有言未盡者堂議欲覈實之令周止劉芳王惲等置局磨勘都事劉郁領其事於上惲等力言其不可不允至於再三曰往事不宜究問此若一行非徒無益適足取怨兼衆怒不可犯

也宜詳思遂寢

時衆陳言等以中元所降詔書內一款節該有上書陳言者皆得實封呈獻若言不可採並無罪責如其可用朝廷優加遷賞以旌忠直至是日有言以未用堂議令詳定官分間其言為三等如體用兼脩切中機宜文彩可觀者為上雖乏文筆其指陳利害有興革之方者為中餘皆為下除現區處人數外其餘量給路費省會寧家聽候



十二月甲午朔時於省東織造局置司集諸路計吏類校一歲簿帳時相領務者退食後日一至按閱程務有未便即改立體式肅如也

詳定官楊威以星變陳書省官宜解機務以避賢者不

然且有咎

先生名威字震亨沼之永安人資剛直敢言達天文知兵金末嘗從軍陝右以勞充

帥府議事官至元十年襄陽降安撫呂文煥過磁先生以詩讓之有云設若汝不來宋祚能有幾須知李陵生何若張巡死呂以白金贈之不受壽八十終州教官有文集若干卷其為文思致甚敏詩乃其所長云

壬寅夜大風雪寒苦時中省官僚未明已即事過晡始

散是早僚屬有後至者省官諭之曰風雨晦暝常情例  
懈在公者當夙興益勵可以辦集而儆其餘也闔省為  
惕然又曰百姓宜安刑罰宜省稅斂宜薄冤抑宜察追  
呼宜簡判決宜審用度宜節興作宜謹燕會宜戒思患  
宜豫防此雖古語於治道且盡可不慎哉

燕省自來置廢官西臺上囂臨近市不稱具瞻以移省  
事上聞奉聖旨遷四王府其列聖神主奉安聖安寺瑞  
像前殿明年以樂善老故府為省署仍以金都省舊額

榜馬

時又於煙霞觀摘委房長纂類一切合奏機務如錢穀數目事事比附舊例多寡有本有末使見節目優劣大槩總撮要領從簡易知極其略殆笏記之體云

中統二年辛酉正月癸亥朔丞相禡禡行帳頓拜郊臺下省事日集樂遊南園

劉行省  
所治

從便首相故也

癸酉左司都事劉郁被譴既而辭退堂議以前進士楊

恕代焉

恕字誠之金內相文獻公子舉落入經義第成德君子也後為翰林待制終易州尹

省府

為發下中統元寶交鈔榜省諭隨路其文曰省府欽依  
印造到中統元寶交鈔擬於隨路宣撫司所轄諸路不  
限年月通行流轉應據酒稅醋鹽鐵等課程并不以是  
同諸科名差發內並行收受如有諸人齎元寶交鈔從  
便却行赴庫倒換白銀物貨即便依數支發並不得停  
滯每兩止納工墨鈔三分外別無尅減添搭錢數照依  
下項擬定元寶交鈔體例行用如有阻壞鈔法之人依  
條究治施行據此須議出給者

一諸路通行中統元寶銜下買賣金銀絲絹段尺斛  
斛一切諸物每一貫同鈔一兩每兩貫同白銀一兩  
行用永為定例並無添減

壹拾文 貳拾文 叁拾文 伍拾文

壹伯文 貳伯文 叁伯文 伍伯文

壹貫文省貳貫文省

文省如七十足陌八十足陌  
若使用銅錢便省官司利益

鈔文故先作  
文省二字

一各路元行舊鈔并白帖子止勒元發官司庫官人等

依數收倒母致虧損百姓須管日近收倒盡絕再不行

使

仍於庫司門首張掛  
省諭諸人各令通知

照勘隨路祇應中間多涉冒濫

議欲行批券法曰此法止可約束委奏闕差疾足而已

達官巨僚不能盡然遂止明定分例行下各道

時圖寫歷代君臣可法政要及自古太子賢孝等事祇  
備向前進說

十日壬子親衛董文炳字彥明藁城人來自北庭知我  
軍大捷中外稱慶省府議所有合行事理剗付各路宣

撫司榜諭者其文曰皇帝聖旨裏行中書省禡禡為頭  
官員欽惟皇帝即位之初下寬大之詔恤疲困之民除  
舊弊立新政條畫非一期於民共享有生之樂省府恭  
承聖訓方將撫治間大軍調發供給軍需轉輸糧餉逐  
急催辦文繁事冗不無少有騷動照得續奉詔書節文  
軍方弭而復興民甫休而再擾欽惟聖憲已嘗軫念及  
此蓋遇一時之變者難拘定例圖遠大之功者未免有  
勞人費物之舉凡此等事皆非得已為天下闕害也近

奉聖旨節文大韓魯朶人來也其餘軍人與民戶每亦多投拜了也即目無咱每迎敵底人也省諭軍民安業務農者欽奉如此欽惟皇帝仁民愛物之心自今以往復得盡行施設今照得已未行事理條列于后務要實行非止虛文而已合行榜示者

一軍馬之事糧草為大近為大軍調遣方當征進之日未見回軍之期省府扣筭年銷所用糧料稗草驗諸路軍均科除各處存留祇應外撥赴軍儲省倉分





終盡數改撥各就附近河倉送納上是帶納水運腳  
錢將來官為雇腳搬運再不動民扣筭今年遠倉糧  
數比附上年各處赴軍儲遠倉稅糧三分中爭一分  
數少亦是減省民力即目年銷糧料足用仰省諭農  
民作活

一欽奉聖旨罷散喂馬稗草等事省府照得已曾行  
下各路宣撫司將已納到官草數除各路年銷外盡  
數給還本戶若有未納者亦行停罷并將元準備夫

役槽鑿等盡數教散歸還去來切恐所在官司因而作弊私下拘占人夫槽鑿仰宣撫司照依已行罷散據各還本主數目遍行省諭無得隱匿尅減務要實到於民

一為軍馬調度凡衣襖器仗馬匹等物省府委官支價收買并搬運糧斛脚力駱駝車仗皆係官錢雇覓外據毛連夾袋止是借倩民力縫造並無賒借科着等事切恐在下官吏等中間作弊拍托軍需為名一

面揭借或有名為和買不支價錢雖支價錢却行尅減上下蒙蔽以致苦難深失朝廷優恤百姓之意若有如此作弊之人許令陳告以憑究治施行今後遇有合用物件依前支價和買

一為去歲桑蠶田禾間有災傷去處欽依詔書已令各路宣撫司驗災傷分數從實減免差發外不被災地面亦令量減分數如此存恤猶恐人苦難又以漏籍并老弱等戶協濟本處當差戶計庶望民力少得

休息外據宣課事亦令驗委實偏重去處量行減免  
所有鹽貨聽從民便買賣食用並無椿配給散之家  
此皆聖主仁政之所先也仰宣撫司照依已行事理  
施行

一欽奉詔書今後各處應有久遠安屯并暫時經過  
軍馬合用糧食於官倉內驗數支給却不得騷擾人  
民仰各處管軍官管民官遞互相照省府照得即目  
春首正及二麥滋榮桑稞生發布種五穀時分切恐

經過軍馬并屯住營寨人等牧放頭匹食踐田禾嚙  
咬桑稞樹木及強要酒食欺奪物件騷擾不安失悞  
農民歲計阻礙通行客旅仰宣撫司行下各管官司  
欽依已奉詔書事理依上照管禁治若有不能斷遣  
者開具緣由申來以憑究治施行

一欽奉詔書農桑衣食之本勤謹則可致有餘慵惰  
則必至不足正賴有司歲時勸課省府照得即目春  
首農作時分仰宣撫司令已委勸農官負欽依所奉

詔書於所管地面內依上勸課勾當務要田疇開闢  
桑麻增盛毋得慢易仍於歲終考校勤惰明行賞罰  
以勸將來

一欽奉詔書鰥寡孤獨廢疾不能自存之人於官倉  
內支糧賑贍仰宣撫司令所在官司依上賑贍仍置  
孤老院存卹住坐

一隨路罪囚除犯重刑奏聞待報外其餘罪囚仰宣  
撫司審問得實別無冤枉就便量罪斷遣毋得留滯

一體究得隨處盜賊往往生發侵害良民蓋是所  
在官司不曾嚴行禁治深為未便省府近為燕京多被  
盜去處明立罪賞嚴切夜禁督勒官兵捕盜人負將  
作惡賊人盡數拿獲依條斷罪仰各路宣撫司遍行  
所屬州縣若有失盜去處照依燕京體例添氣力多  
設方略隨時捕捉明立賞格嚴行懲誡如有捉獲強  
盜之人除官賞外更於賊人家產內給付充賞若有  
同伴賊人并安泊之家及兩隣知而不首者同罪失



覺者量行治罪

一若有游手好閒不務家業賭博錢物開張酒肆之人仰所在官司常切禁斷若有違犯者治罪施行

一州縣之治俱在官吏若得其人百姓安集差撥均平苟非其人定是差撥不均民被其害不有黜陟賞罰何由激勸懲誡據本路見任官吏如有贓污事者國有常典其才能異衆廉幹可稱者仰宣撫司開坐事跡保申來以憑聞奏超擢任用施行

丁巳元夕大風雪晝暝有衆盜劫民家是晚官寮聚省  
出重賞捕賊明日獲焉

二月癸巳朔五日丁酉行省官奉旨北上後三日憚與  
偕行者周定夫已刻遇河南經略使史公於居庸南口  
相與迎謁道左公問禡相所在曰次西南土樓村公相  
見而去知車駕回鑾北兵已敗遁去行者居者為熙然  
也前次北口店復有旨山北寒沍可緩來遂還是日遇  
張國公於中店說見齋亡金實錄赴省呈進省官時繕

寫進讀大定政要得此更為補益之

時鈔法初行惟恐滯滯公私不便省官日與提舉司官及採衆議深為講究利病所在其法大約隨路設立鈔庫如發鈔若干隨降銀貨即同見銀流轉據倒到庫銀不以多寡即裝垛各庫作本使子母相權准平物估鈔有多少銀本常不虧欠至互易銀鈔及以昏換新除工墨出入正法外並無增減又中關防間庫司略無少弊所納酒醋稅鹽引等課程大小一切差發一以元寶為

則其出納者雖昏爛併令收受七道宣撫司管限三日  
午前將彼中鈔法有無底滯及物價低昂與鈔相礙於  
民有損者畫時規措良法以制之在都總庫印到料鈔  
不以多寡隨支脩隨路庫司關用外一切經費雖緩急  
不許動支借貸其錢貫顯印鈔面將來以錢鈔互為表  
裏此張本也時週歲包銀六萬餘定鈔數印及五十餘  
萬堂議嘗云若印至百萬所獲差息可盡免天下包差  
蓋以平準貿易諸物一歲民間毀廢不貲皆為官息也

又當時鈔法有甚便數事艱得一也經費省二也銀本  
常足不動三也偽造者少四也視鈔重於金銀五也日  
實不虛六也百貨價平七也

二十一日癸丑未刻淮海都督府申宋人圍我海州堂  
議飛奏外命惲馳省檄馳海青傳催發經略史公令率  
河外諸軍往援既啟行隨得報云宋人已退走遂止  
二十二日役來趣闔省北上越

三月壬辰五日丙寅未刻丞相禡禡與同僚發自燕京

是夕宿通玄北郭偕行者都事楊恕提控术甲謙詳定  
官周止省掾王文蔚劉傑

六日丁卯午憩海店距京城廿里凡省部未絕事務於  
此悉行決遣是晚宿南口新店距海店七十里

戊辰卯刻出居庸關世傳始皇北築時居庸徙於此故  
名兩山巉絕中若鐵峽少陵云硤形藏堂隍壁色立積  
鐵者蓋寫真也控扼南北實為古今巨防午憩姚家店  
是夜宿北口軍營月犯東井鉞星或者云斧鉞用兵之

兆距南口姚店三十里而遠

己巳辰刻度八達嶺於小雨間俯望燕城殆井底然出  
北口午憩棒捶店天容日氣與山南絕異以暄涼較之  
爭逾月矣午飯榆林驛其地大山北環舉目已莽蒼砂  
磧蓋古媯川地也是夜宿懷來縣南距北口五十三里  
縣東南里許有釀泉井水作淡鵝黃色其曰玉液即此  
出也官為置務歲供御醪焉

庚午泊統墓店詢其名土人云店北舊有統軍墓故稱

是夜宿雷氏驛亭地形轉高西望雞鳴山南眺桑乾上流自奉聖東諸山下注白波洶湧若驅山而東雞鳴山者昔唐太宗東征至其下聞雞鳴故名東南距懷來七十里之遠

辛未午刻入宣德州申刻使者也鮮乃至傳旨趣令諸官速赴行殿是夜宿考工官劉氏第

十一日壬申候禡相為一日留蓋有所需也距雷氏驛九十里癸酉行六十里值雪宿青麓



十三日甲戌至定邊城憩焉蓋金所築故城也是夜宿黑崖子距青麓九十里

十四日乙亥抵揠場峪蓋金初南北互市之所也是夜露宿雙城北十里小河之東南距黑崖子北一百有五里

十五日丙子停午至察罕腦兒時行宮在闕申刻大風作玄雲自西北突起少頃四合雪花如掌平地尺許亂灤河而北次東北土樓下羣山糾紛川形平易因其勢

而廣狹焉泉流縈紆揭衣可涉地氣甚溫大寒掃雪寢  
以單革煦如也沙草氄茂極利畜牧按地志灤野蓋金  
人駐夏金蓮涼陁一帶遼人云王國崖者是也上命平  
章王文統草答高麗手詔其辭有誦經供佛為國祈福  
良可嘉之語選怯薛丹某官借職伯衛將軍以高逸民  
借職禮部員外郎為副使其國將發高麗世子來覲止  
焉初高麗國相有以書致寒暄於省府者欲以書為答  
且以方略撼之俾見我大國文加武暢之盛憚曰不可

境外之交非人臣所宜此范文正書諭元昊遂得罪於裕陵也可不戒哉乃止

十六日丁丑上遣參知政事張易廉右轄廉名希憲字人甫澣海人天資沈毅臨大事不可奪其廉正有大臣風節傳旨慰諭行省官時御道不啟拜覲者皆俟故留八日而發距雙城七十里

二十三日甲申次鞍子山南距灤河四十里

二十四日乙酉次桓州故城西南四十里有李陵故臺

道陵勅建祠宇故址尚在未刻朔風發雨霰交作傳令  
方春牧馬不勝寒克瘦弱者悉用氍毹搭覆其背否者  
以法從事

二十六日丁亥時諸王有以宥令行下本管及祝香四  
岳者朝廷以當否為問省官婉辭以對此無他止是爭  
欲徼福耳若大制一定此事自革晨霜蔽野如大雪日  
極高陰凝始釋距鞍子山廿有五里是日完州人高道  
字道之來自和林城說迤北正二月間地草自燃東自

和林西至炊州其燃極草根而止水溫處愈甚人往來者須以氈濡水覆其上可越又有黑風掠人面如灼兵械及山椒遇夜皆有火出在山者如列炬然或者云火兵象皆彼自焚銷鑠之兆

二十七日戊子次新桓州西南十里外南北界濠尚宛然也距舊桓州三十里申刻歛有兔自北來入王相帳中獲焉公曰兔陰類性狡一舉而得吾事其有解矣

二十八日己丑飯新桓州未刻扈從鑾駕入開平府蓋

聖上龍飛之地歲丙辰始建都城龍崗蟠其陰灤江經其陽四山拱衛佳氣蔥鬱都東北不十里有大松林異鳥羣集曰察必鵲者蓋產於此山有木水有魚鹽麋狼藉畜牧蕃息大供居民食用然水泉淺大冰負土夏冷而冬冽東北方極高寒處也按方輿志蓋東漢烏桓地也距新桓州四十有五里

二十九日庚寅風霾四塞日三丈許方解

三十日辛卯立夏風色尤慘淡無光

夏四月癸巳壬辰日氣極清明有輝

二日癸巳陰慘盡日

三日甲午極晴和

四日乙未頗覺暑氣是日向已憚從徵君竇許李洎九  
道宣撫侯雲叟公疾於私第茶畢而退

秋澗集卷八十



欽定四庫全書薈要卷一萬六千二百三十七

集部

秋澗集卷八十一

元 王惲 撰

中堂事記中

五日丙申陰晦王相同左右司郎中賈居貞始入朝陞  
見上喜甚既退侍中和者思傳旨命與諸相集議六曹  
并九道宣撫事於中書堂

六日丁酉諸相會左丞張仲謙第

左丞名文謙字仲謙  
邢州沙河人資安和

靖公內敏於正不大聲以色憚為都司睹公來催帳竿  
暮二事因數曰朝家事有大小事需議可敢奏稍緩無

方餘則不然吾子切念之以決前議大抵選官薄賦評  
今日思之可為至言也

鈔法等事論者頗交雜王曰何傷取其長便者用焉未  
刻諸相入見進大定政要因大論政務於上前聖鑒英  
明多可其奏班退諭相曰翼日朕郊祭醺馬駟馬卿等  
不必扈行凡內外之務比還悉裁定以聞

八日己亥天日極晴朗上祀天於舊桓州西北郊皇族  
之外皆不得預禮也

九日庚子晴暖諸相圍坐都省集兩曹掾史讐九道民

事

十日辛丑王張廉三相洎賈郎中會議政事因論功利等事且曰世代下衰其勢有不得不爾者時惲亦預坐因徐起而言曰功利既不能弛心與術亦不可不辨也且心以居正為體術以應變為用總之體不失而有成者為上此大臣所先務也三相愕而起

十一日壬寅保定總管蔡國公嗣子和畧以本道鈔決事來議都堂為經畫之已刻張叅政廉右丞會王相第

令詳定官周止縷讀衆士嘉謨而詳聽焉僉曰不為無益也繼會九道宣撫定議官制輕減民賦等事申刻東北雲起蒨若潑墨雨東來散絲千門間乍暑霑潤為一快也

十二日癸卯諸相集庶右丞第審定前議盧進之飯馬餉午鑾輅還宮有頃侍中和者思傳旨召諸相入朝遂以軍國大政上聞都俞際衆悉之以對天顏為喜動且有恨其見晚之嘆是日平章趙璧以軍儲事被譴胥靡

於家甚嚴憚時從承旨王公上詣趙公心雖惕厲氣量

裕如也從而不去者唯門下士李革在焉

趙事為結束平粮事李九

山謂此事蓋意起于陳德秀禍成于杜彥深公實不知也是日河南宣撫兼經

畧使史公至自汴梁

十三日甲辰卯刻會廉右丞第辰刻諸相入朝以議定六部等事上聞綸音撫慰大允所奏曰向來羣疑渙然冰釋比出宮小雨浥塵緩轡沙堤有不覺其喜者晡時張叅政廉右丞會王相第已奏允諸務來審聽焉

十四日乙巳雨午刻開霽會楊宣撫果張宣撫德輝劉宣撫肅張右丞再議民賦事蓋有所未盡故也

十五日丙午有旨就上都長春宮作清醮三晝夜為民祈福奏告文字交王鶚定撰者其辭有既獲畀矜之福宜隆敷錫之恩六轡屬還歸之際一家孚保乂之休言念蒼生不無素擾或凶荒之災相望或轉徙之苦相成雖勅有司俾修善政更祈照鑒普洽鴻私是日已刻廡右丞張叅政會王相第呼金齒蠻使人問其來庭之意及

國俗地理等事言語侏離重譯而後通國名百夷蓋羣

蠻之總稱也其闕

在大理西南數千里外而隸六詔焉

曰阿津者龍川部長塔哈所遣偕來者八人始自戊午  
冬發於本土至是方達上都其人衣冠裝束髻髮于項  
裏之絳纒復以白疊布盤繞其首衣以皂繒無衿領之  
制膝以前裂而編之如懸索然眉額間塗丹墨為飾金  
其齒蓋國俗之賤者也意思野逸殆驚麋然其土宜稻  
有牛馬山羊鷄豚鵞鴨之屬兵械有刀槊手弩而無弓

矢甲冑既而遣還上命中山人劉芳借職兵部郎中使  
其國都堂命憚草詔其辭有嘉爾等跋涉修阻懷德遠  
來首輸事大之誠克謹畏天之戒轉為宣暢皇猷告諭  
隣附俾知國家威靈無遠弗届之意是日耶律中書來  
自漠北

十六日丁未史經畧張右丞洎衆宣撫集都堂條具民  
政

十七日戊申辰刻諸相入朝以集議聞上一允所奏向



夕出宮

十八日己酉省奏准條畫民事凡廿七款為施行之  
十九日庚戌百僚入見少頃出會東省奉旨召九路總  
管頒示新典若有所陳即具以聞除河間真定餘畧有  
異同復為商確奏裁以定

廿日辛亥內宴不克見是晚工部石里忽

即李

被問堂命

都司楊恕提控趙謙同惲等磨勘工匠支銷等簿達曙  
不寐

廿一日壬子都堂令惲檢討唐人置信牌鎖長官廳事  
諸相辨析石里忽事責遂有所歸已刻既雨而雪寒  
盡日

廿二日癸丑入見午刻諸相圍坐雙校九道宣撫殿最  
時東平撫司民賦有未足者某官對云云省官曰不聞  
詔條使戶口增差發辦方為稱職某官以不敏謝及議  
中外新舊官改授定制轉午雨雹蔽地大者如彈丸俄  
而風作土下如雨黃霧四塞逮酉刻間開霽

廿三日甲寅司天臺官中順大夫張闕為雨土事以民  
勞上聞明年新都之建遂經始焉

廿四日乙卯極晴朗諸相入朝奏准七道宣撫司所行  
條畫

一中統元年科訖差發多有不盡戶計所據今歲科  
差須管子細照勘務要盡實科徵不致隱漏兼各路  
投下戶計差發欽奉見降聖旨亦從各路總管府驗  
數科徵仰各路管民官照勘本管地面內見住人民

戶口不問是何人等應合收係當差者須管從實盡數科徵見了數目開坐關部轉行申省聞奏若是中間却有漏落不盡實去處事發到官定將當該官吏嚴行斷罪外宣撫司有失體究者亦行治罪仍先取管民甘結文字

一中統二年差發雖已定立限次仰各路管民官吏為斟酌彼中事勢催徵如限內併納者聽務要民戶安差發辦乃為稱職

一起置信牌事緣為各路遇有催督差發勾追官吏等事多用委差官併隨衙門勾當人及曳刺祇候人等投下文字不得騷擾民間轉致遲悞官中事務為此擬定今後止用信牌催辦一切公事據置到信牌編立字號令長官次官圓簽於長官廳事對鎖收掌如總管府行下州府科催差發并勾追官吏等事所用信牌隨即附簿粘連文字上明標日時定立信牌迴日勾銷并照勘稽遲限次究治施行若雖有文字

無信牌或有信牌無文字並不准用迴日即仰本人  
賫擎前來赴總管府當廳繳納當該司吏不得一面  
接受落闕如違究治據府行下司縣其司縣行下所  
管地面辦仰依上施行

一各路所設急遞鋪委自宣撫司提領仍禁約訟路  
不得奪要文字本管官司亦不得科取差發錢物并  
照刷遞轉文字如有稽遲日時約量治罪據鋪側近  
住坐或開店買賣聽過往軍馬使臣人等並不得騷

擾遞轉文字除申朝廷省并本路行移官司緊要文字外其餘閒慢文字不得入遞亦不得私下夾帶一毫物件轉送仍常切存恤不致逃竄失所若有違犯仰宣撫司究治施行

一宣撫司若遇緊要并機密公事須當赴朝省計稟即仰乘坐鋪馬走遞如是尋常公事止令入遞轉發除降去起馬劄子外本司更不得別給起馬劄子

宣撫司起馬五疋 副使四疋

委差官令史人等三疋

一宣撫司官比及頒俸以來權依使臣分例批支

一宣撫司曳刺祇候人比及定奪止設人數每司權

設二十午刻諸相大合食於省堂之西偏奉旨命

平章王文統舉讀史一人遂以詳定官周止膺選

廿五日丙辰諸相按問高麗質子王淳與淇甫事未刻

新舊宣撫拜命於省中就付條畫新制及諸換授官資

者悉裁遣之



廿六日丁巳辰刻入見上以錢穀大計問平章文統數

對明敏慮無遺策

凡軍國大事皆有成筭然後撮其要領使例相比

廿七日戊午上命平章王文統與前省官庭辨中元民賦虛實比上年多寡之數若人為語塞

廿八日己未暑氣甚隆有旨昨者比附前政甚優終未服其心也奏准差宣使布薩禧悉起燕帟所有金帛等物是日特旨命趙璧平章政事知政其夜諸掾以會計故達曙不寐

廿九日庚申王相以簿書委積重為規畫授諸掾成筭  
以備不時顧問

三十日辛酉前相臣安天合授西京路宣撫大使仍錫  
金虎符特寵異焉未刻堂命惲草宣諭大理及合刺章  
俾還本土手詔其辭有云嘉汝等遠自雲南導從選鋒  
轉戰千里直渡鄂清以達於此勤已至矣今者俾爾各  
還本土以遂厥性之語各優賜人有差是日九道所造  
狐貂衣裘其數畢具王相命省掾王文蔚并惲用棋方

格子通類比附使見估直高下孰省孰費且曰茲蓋史臣年表遺法固非吏輩所能知也蓋有所謂而云

五月甲午壬戌朔黎明達官巨僚畢集中省遂檢前省民賦以上年比中元數多而所入者鮮以中元比上年戶同而所入者廣論辨者久之前省官屈服始無異議焉諸相僉曰先後之事明矣遂具以聞夜漏下八刻庶右丞賈郎中傳旨曰若輩無狀凡所以欺蔽不應等事悉索焉以聞

明日癸亥天威雷震前省官始知懼待罪矣中外聞者  
有萬口一辭之快是日巳刻東平宣撫司申國信使郝  
經等為宋人扼駐蘄州渦口不遣入國事既而知為宋  
人所誑我實不審所在也未刻復遣戶部員外郎王煥  
催發燕藏諸物

初三日甲子晴朗盡日詰問前省官事是日九道宣撫  
其先赴攸司及諸換授官入朝陞辭歡聲和氣洋洋郁  
郁滿皇都而載歸路矣上京路總管忙古都喜見諸相

於都堂

識所謂海魚九尾者

四日乙丑問前省官事

五日丙寅問前省官事已刻寥休上人來自南庵諸相

就謁於龍光北寺識所謂溫庵主者未刻有旨命宣撫

姚樞赴省同議軍須調度等事

姚字公茂柳城人資明亮深識有理學嘗從征

大理有佐命至元改元轉天下官公力為多上嘗曰公茂善談論物之圓者只說出柄來官至中書左丞終翰

林承是日左司都事楊恕傳都堂鈞旨令惲草移宋三

省牒文向夕陰晦大風其牒草云大蒙古國行中書省

移宋三省皇帝即位之初重惜南北生靈之故一視同仁  
首主和議特遣信使敬奉國書講信修睦往年征進  
大軍即令分還本屯仍嚴勅邊將非奉上命毋得妄動  
爰自行人銜命已來載更歲律寂無來音其餘講修之  
事將如何哉不惟有失忱辭反啟邊釁以至攻圍我上  
石侵軼我鄧鄙襲華陽擾隨州劫掠真陽數犯漣水皆  
出於使輶已入彼境之後夫信與義自古所恃以為國  
者也一旦捐棄曲直所在自有任其責者矣若和議可

必即當速遣重使與我行人偕來其或逗留歲月別有  
異議請選師徒具戈甲預致師期相與會獵於江南之  
地可也於斯二者惟所擇焉比來閩將屢請出師以報  
侵疆之役省府謹守聖訓弗允所請不識日者數舉果  
何為而然耶今大駕北狩已是南遷陞見之日何以為  
奏冀早示定議毋坐失良圖以貽後悔

七日戊辰卯刻百夷奉使劉方成行已刻入見多所陳  
奏皆常例事內一條禁不得以馬挽車引碾及無故屠

宰重兵力也是日發郎國遣人即獻卉服諸物其使自

本土達上都已踰三年說其國在回紇極西徼常晝不

夜野鼠出穴乃是入夕人死衆竭誠籲天間有魑者蠅

蚋悉自木出婦人頗妍美男子例碧眼黃髮所經途有

二海一則踰月一則暮月可度其舡艘大可載五十百

人其所獻醖葷蓋海鳥大卵分而為之酌以涼醕即溫

豈世所謂溫涼蓋者耶上嘉其遠來回賜金帛甚渥是

日懷孟路勸農官王秉中

字仲

來王相令訪問枋口去



路六十里屬濟源縣所開水利即今溉民田幾何仲搆  
曰水舊名古秦渠蓋魏末司馬孚創修至隋盧賁復開  
治唐太和間河陽節度使大加疏導溉河內河陽溫濟  
武陟五縣民田五千餘頃宋天聖初枋堰始壞至是仲  
搆復為起廢又云初興役特掘地丈餘得栢枋數十段  
稱曰枋口豈因是得名乎是夜內庭官和爾布哈

布喇奇及

第二子時年三十一歲

飲諸相於中省既夕繼之以火二鼓方散

八日己巳對問前行部尚書馬月忽乃事所牒宋三省

又移河南宣撫史公令改作經略司牒宋淮東制司施行就令選官充詳問官者經略公以太原士人崔明道為使南京兵馬副都李合義貳焉以往其意蓋以或有牒之則後無不順先以省檄繼焉故也堂議中書出政之地人雜選莫能禁奏准

令怯薛丹二人監約省庭間自是中省之務頗清肅焉是日都堂命惲編類歷代水利營屯田漕運錢幣租庸調等法及漢唐已來宮殿制度等事已刻上御萬安閣四川楊侍郎遣其子以弓矢等物具表來獻及迴上以

手詔答之楊大淵省表具之朕恪守王封遽膺推戴即  
位之始不遑靡寧惟爾遠戍邊陲久服戎政身外心內  
來陳賀章宜加寵答之辭以勵忠貞之節故茲昭示想  
宜知悉又一回紇醫者貢橐駝三十頭鞍具幪帕全光  
彩照地鳴鼓吹螺自皋門而入又一回紇贄栗色宛馬  
入拜玉面鹿身聳立如畫所謂脫必察者也申刻省起  
諸相候薦右丞疾

九日庚午推問馬月忽乃事已是日皇弟摩哥大王世

子昌童封永寧王仍改父王玉寶為金印命惲討論古  
令諸侯王印制遂製紐為駝作三臺其文曰永寧王印  
十日辛未堂議欲以元寶鈔背用闕防印誌既而議不  
便但令比戶粉壁嚴偽造之禁從楊宣撫果議也有旨  
遣上都同知阿合馬計點燕京萬億庫諸色物貨

十一日壬申堂議曰古者天子有八寶蓋所以崇天授  
而鎮萬方也今朝廷所用止一寶而已欲議奏令印工  
季并餘寶皆刻而為之用古文奇篆殆受命璽然惲曰此

非可輕議也又務繁需再議焉已刻上手詔宣諭四川  
侍郎楊某曰勇冠諸將名配古人知大義之可為籍諸  
城而來附獻以金帶示以誥牋載詳終始之誠宜示褒  
崇之禮可特賜虎符充夔府路行省兼安撫勾當更宜  
招懷未附共底不平但桑蔭不移而能立其功雖茆土  
至重而朕無所惜其賜卿某物至可領也諸相大合食  
達官巨僚於都坐皆霑醉而罷

十二日癸酉有旨先召首相二三人入朝餘俟命於省

署既而以大宴不克見上都留守同知阿合馬兼太倉使請立和糴所以溢廩庾堂議以曹人李亨字通甫勾當和糴事改和糴為規措所亨脩人事極經畫已而粒米狼戾少尹愛其能焉

十三日甲戌究問前省官一切事理皆有定論今左右司官具奏目然後詳聽已上聞以見上下通知故也午轉大雷電以雨且有電蔽地向夕內省官和爾布哈傳旨令前省官及諸路在都管民等官詰旦集闕下以聽

聖訓

明日乙亥寅刻詔罷東平路管民總管兼行軍萬戶嚴忠濟仍敕戒諸路官寮無是效焉國有常刑犯不容不嚴其初授制辭有云爾父承國家興運左右將士同心戮力封植東平施為名藩我祖宗嘉爾父之功乃建為侯自爾嗣位又廿年朕初即政復命襲爵往即乃封敬之慎之其修德砥行自立名節勉圖後效無忝先猷至是未見顯咎遽為黜罷或者不知而異焉未刻諸相退

朝圓坐按問李宣撫王正之等事既而廉右丞傳旨召平章王文統遂入見上於香閣夜漏下廿刻方退

十五日丙子誅東平經歷官邢衡銓初邢以事告叅政張易詰對於上前邢款服命諸相監戮於都城東十里外張手剗其腹從初請也

十六日丁丑雨廉右丞耶律中書張叅政王平章推攷定奪諸路戶口等事

十七日戊寅諸相復定擬大明西京北京賦稅戶口未



刻藏春仲晦來朝諸相就見於李虞卿宅略話而退是  
日已刻上臨軒親諭諸路總尹遂以前東平總管嚴忠  
濟弟忠範為東平總管仍戒之曰兄弟天倫事至於此  
朕甚憫焉今予命爾尹茲東土非以訟受之也彼所責  
匪輕敬哉今而後苟不克荷非若汝兄幸而免也至是  
知忠濟之失皆為其弟所發因各賜馬厔慰遣復有改故從新之諭  
又黜大名路達嚕噶齊阿嚕嚕河西人小李鉗部之子  
也

十八日己卯晴暑上召前濟南宣撫宋子貞真定宣撫  
劉肅河東宣撫張德輝北京宣撫楊果於內殿以擢用  
輔弼為問楊果等前奏曰王文統材略規模朝士罕見  
其比然以驟加登庸物論不無新舊之間如史天澤累  
朝舊臣勲碩昭著若使宅百揆大厭人望令文統輩經  
畫其間則省事成矣上曰置史某相位念之久矣卿等  
所言允協朕意因賜食而退

十九日庚辰入見奏裁大拜及六部事詔以世臣布哈

經略史天澤為右丞相布哈時三十三歲憲宗朝怯薛  
丹長領斷事官其祖太祖神元皇帝朝功臣父也孫托  
哈憲宗朝萬夫長和爾布哈耶律鑄為左丞相和爾布  
哈時年三十一歲父布喇奇及官人塔察爾廉右丞平  
章政事塔察爾時年廿八歲其父憲宗朝世臣千夫長  
張參政為右丞宣撫楊果宣撫商挺叅知政事餘如故  
是日諸相入見將退上慰平章文統曰卿春秋高恐勞  
於奏請今後可運籌省幄若有大議須面陳者及朕有

所咨訪入見小事令人奏來不必煩卿也上以王姬下嫁午刻幸新桓御營

廿日辛巳奉旨命承旨王鶚定撰諸相制詞

廿一日壬午時暑闔省大燕慶新除也時既相史公所事皆倚重焉丞相曰天澤武臣何克負荷但物務未安者老夫通譯其間為諸君條達耳相則予曷敢當衆愈服其謙抑皆霑醉而散是晚承旨王公命惲賁所撰制詞呈省其文通作一卷實封細銜書名上用院印或問

馬曰白麻蓋自中出令實封防其外泄亦唐人鎖院之意也既披詳或欲有所更定憚力言其不可昔楊億以一壤字不勝其慙況改作乎第修飾之可也其史相詞頭有惟卿世篤忠貞材兼文武樹戰功於疆場卿力良多論機務於廟堂朕心允協宜示百僚之式俾居諸相之先可特授中書右丞相卿其振紀綱崇體要往服新寵以壯舊猷

庶希憲惟卿秀拔父兄學尊師友往綏諸道視民一似

如傷就建行臺臨事毅然有斷宜從政轄進署相銜可  
超授平章政事惟暨乃心以答朕命

楊果擢秀詞科馳聲劇縣佐南州之經略才已見稱專  
北郡之撫綏人皆受賜政之參決僉曰汝諧可特授參  
知政事祇服寵休益思報稱

廿二日癸未申刻堂議定省規一十條

其一曰凡三日一奏事軍國急務不拘此限

其二曰置勤政簿一扇凡公議已定事詳見于簿讀一

譯不得增減言得日標題於逐款之上還省立檢圓  
覆定行

其三曰圓議定時首領官先擬定其事自下而上相次  
剖決議定題押批判若事關利害情見不同者各具  
奏稟

其四曰圓議時非定負不與知本房者不在回避之限  
若事涉機密者已次請退

其五曰同僚赴省日出為期停午乃起旬一日暇事遇

急速不拘此限有疾故者須令報知庶免延待而已  
其六曰省府官并屬官各家不許受詞訟公文

其七曰如遇闕員圓議公選不得用門下人補充

其八曰省府通譯史額定選充餘者不與

其九曰奏事上前宣讀通譯人各一員

其十曰凡告事說事者聽畢避其人公議定然後回答  
僉曰所畫理到遂施行焉

廿四日乙酉巳刻奏准粘合中書授平章政事北京行



省前歸德府官民總管張子良為河南宣撫使

張字漢臣以名

行午刻令郎中賈居貞照勘一切換授宣牌事無有稽  
緩

廿五日丙戌平章塔察爾日令叅政楊公說通鑑三五  
段是日至吳太子明密中鼠矢事塔爾琿掩卷曰我試為  
論之與正說合一省為屬目僕散禧起燕京帑藏至上  
都辰刻上觀於內藏喜甚曰自祖宗已來未有如是之  
多也申刻平章廉公郎中賈居貞掾高明赴新桓御營

奏事堂議專委叅政楊公定奪內外新舊官資是日諸相授麻制於都堂詔下中外稱賀不勝其喜曰自國朝開創已來論其得賢於斯為盛時有言綦陽鐵官不便者大抵其民皆殷實上戶歲官得鐵甚鮮不能當歲輸包絲稅石之數若用此易鐵可增官煽數倍之上堂議曰若奏上朝廷即從然不重慮恐未免橫議仍令憚與工掾李鼎計勘一歲常課所造幾何橫造幾何一歲通可用鐵幾何在都廣備庫見有鐵幾何且可支幾年用

度其外路應有鐵貨可支幾年用度既已公曰未也若  
令民間興煽官為抽取凡幾爐一歲通可得鐵幾何既已  
公曰未也若都除內外見有數目止以民間一歲抽到  
鐵數可供幾年正橫造作用度既已公曰未也若將冶  
戶合人差稅取酌中價直一歲委可易鐵幾何有無少  
餘既已公曰未也更為積筭一歲合用礦炭支役且以  
酌中定數有無虧損官民既已公曰未也更為大約鐵  
官一歲及上下一切侵漁掊克虛耗官物幾何既已公

曰可也明日奏上果有恐失悞造作為言者以是應之  
遂罷治戶歸民因訓憚等曰書生論事大槩不差及詢  
其所以方略鮮有不遲疑者若將讀書苦心移之治此  
只一燈之功爾於政事何有汝等勵精焉可也何患茲  
位之不到哉是日不魯海牙授御史大夫兼大司農省  
諭一切言告事人不得私家請謁投訴遵新令也

廿七日戊子亭午右丞相史公赴永寧王榮授改鑄馳  
紐金印餘相圓坐照對燕京路民賦未刻掌記魏初來

自燕城申刻定議公府署押事右丞相史公與丞相和爾布哈五日輪番一秉筆長官從上押右者處外邊一左一右以次而下圓坐亦然所謂廟坐廟畫也日將夕有大流星隕自巽位白光照野移時方散是日劉宣撫才卿說前朝省府各房止立鈞旨簿無行卷六部應呈事務左右司官議定可否粘方帖于部呈上書送字得都座准議省雜批鈞旨於後其在右司元書送帖亦不揭去用省印傳其上蓋上下互為之防然後送部施行

燕京路宣撫徐世隆威卿說舊日戶部設審計科以料  
週歲所入幾何經費幾何遇有支發至十萬貫部方呈  
省大抵係常例有定體者如百官貫石之類是也外郎  
邢敏說舊日郎中與外郎都事另幕坐是年秋與郎中  
不同處矣及有所編省臺定式亦有可取者劉宣撫又  
說舊日殿上奏事止左右兩司郎中其人賢遇執政有  
闕即拜參知政事

廿八日己丑右丞相史公首秉判署是日命掌記魏初

令史馮崧執掌奏事諸簿午刻奉旨定擬中行兩省去  
留人員抵暮張右丞下朝說所奏事天顏甚喜交史丞  
相張左丞楊參政留中王平章廉平章張右丞行省事  
于燕

廿九日庚寅催督中外一切未經換授宣牌等事恐留  
難故也省退王相置酒私第會劉才卿宋周臣姚公茂  
王百一竇漢卿張耀卿許仲平李士都蓋留別故也是  
日嚴忠範授東平路總管李士都授翰林侍讀學士其

制辭曰李昶學禮傳家明經登第練國家之典故經士行之操修方當青史之編宜與玉堂之選宜公褒貶以示勸懲

夏六月辛卯朔卯刻艮方有青紫二氣橫亘間錯長袤數十丈移時弗散已而霧雨交作不見天官書云凡星變氛祲三日內有雨大小凶咎即亡嘗以理推之乖則致異和則為雨既和而雨其災自無經曰往遇雨則吉是也



二日壬辰晴暑詔賜木苑大王駝紐金鍍銀印其文曰  
建昌王印時王見征戍大理諸部建昌雲南之別稱也  
都堂為諸投下種田戶奉旨逐款施行一烏蘘婁巴圖  
爾為頭衆探馬赤官人每乙未年皇帝聖旨為逐官出  
氣力上撥到種田人戶擬自今後每年除絲綿稅糧照  
依舊例合納包銀內一半納官一半給付本官用度

闕

一有幹只思皇后下民戶八十五戶內六十戶元係牙  
刺瓦赤全定包銀來今擬將合內包銀內一半納官一  
半赴本投下送納外有諸雜戶計一十五戶內打捕一  
十一戶依舊送納絲糧隨營一十四戶種田納稅買賣  
納商稅

一有阿齊齊大王奏告為先奉聖旨於太原路五戶絲  
內支與皇后合敦銀一百五十定內除支訖外欠一百  
二十定仰于本路五戶絲料內中統一年為始分作三  
分年放支與者外據種田民戶二百一十戶合納稅糧  
數目令本位下就用除已行下放支外仰照會施行絲  
線包銀與其餘民戶一體科撥

一有搭察爾大王奏漏籍戶事仰依已行詔書體例行  
者

一有烏拉噶齊妃子從嫁民戶差發并匠人關取係官  
絲線織造段疋本投下送納事仰就便取問本位下人  
員據上項民戶差發若前斷事官定下全撥今擬減免  
一半如已定減半者今擬全免外據匠人依前關取係  
官絲線織造段疋赴本投下送納者

一隨路應有金銀銅鐵丹粉錫碌等審治附籍漏籍民  
戶盡行罷去分付元附籍地面官司應當差發今後許  
令諸人等有願入狀採打煇煉不用官本及占役百姓

者據所得數目官為斟酌抽分若元管頭目等願入狀不用官本及占役百姓興煽者聽如不願者許他人入狀承認

一河南路管下舞陽等處栽薑戶仰與民一體當差每年合用生薑就燕京官為和買

一諸投下壬子年附籍軀口仰照依先帝聖旨於各路附籍處依舊例當差者

一張綽爾齊奏隨路樂人差發事仰行下各路宣撫司

與民一例當差止免雜役仍仰各處官司都不得因而  
騷擾不安遇有樂人赴闕承應官司斟酌闕與起發者  
一呼塔噶奏有察罕圖撥與李婁岱壽州民戶內附籍  
三十一戶見當絲線包銀稅糧外有漏籍三十一戶內  
有打水獺一十戶乞定奪事仰照勘附籍民戶別無爭  
差依種田戶例送納絲糧外據包銀一半納官一半與  
本官用度所據打水獺戶不須打捕水獺與其餘漏籍  
民戶一體於該管官司當差

一藤花戶交各處官司與民一體當差仰斟酌氣力約  
量科取加存恤外據年例合用藤花仰所屬地面官司  
從長計置趁時採摘依數送納毋致減裂採取闕少用  
度

一浩沁達爾罕大名府民戶五百餘戶每年除納絲線  
稅糧外不納包銀止納軍闕漢軍銀二定二十九兩次  
後斷事官按脫定下與民一體當差仰依元行例與民  
一體當差施行是日未刻奏定左右三部尚書等官

秋澗集卷八十一



謹按卷八十第二頁後六行瑪爾默舊作瑪瑪今改 四

頁前六行珠嘉謙舊作朮甲謙今改 六頁後七行阿

固岱舊作阿虎歹今改 後八行穆蘇舊作麥肖今改

七頁前一行吹坦八哈齊舊作曲天八合赤今改

前二行唐古特舊作唐古鰓今改 前三行魯塔

徹爾舊作老塔察兒又揚戩舊作燕真今並改

前四行伊尼格舊作亦捻哥今改 前五行阿都齊

舊作幹脫赤今改 前六行呼圖克舊作忽都今改

八頁前二行阿哩和卓舊作阿里和和今改 前三行  
塔納特爾格舊作道奴大哥今改 前四行王哈喇舊  
作王合刺今改 前八行布薩舊作蒲散今改 後二  
行特穆爾舊作帖木兒今改 後四行瓜爾佳呼圖克  
舊作夾谷忽都虎今改 後六行莽珠迪音舊作麥木  
丁今改 後七行布蘇瑪勒舊作普速蠻今改 十頁  
後八行綽爾齊舊作抄兒赤今改

謹按卷八十一第四頁前三行阿津舊作阿吉又

塔哈舊作塔亨今並改 十三頁前六行和爾

布哈舊作忽魯不花又布喇奇舊作不令吉今

並改 十八頁前四行布喇奇舊作不令吉今

改 二十一頁前五行塔爾琿舊作塔公今改

二十五頁前三行烏蘇婁巴圖爾舊作阿朮

魯拔都魯今改 二十六頁前一行齊齊舊作


吉赤今改 二十七頁前八行綽爾齊舊作抄

金方月令  
免赤令改 後三行呼塔噶舊作忽都花又察

罕圖舊作察罕禿又婁岱舊作羅歹今並改

二十八頁前五行浩沁達爾罕舊作火赤達刺

罕今改



總校官進士 臣胡榮

校對官學正 臣卜維吉

謄錄監生 臣戴璵

欽定四庫全書薈要

集部

秋澗集卷八十二

詳校官助教臣謝登鵠



欽定四庫全書薈要卷一萬六千二百三十八

集部

秋澗集卷八十二

元 王惲 撰

中堂事記下

癸巳京兆參知政事商挺

字夢卿子叔子

馳奏關陝重地

後餘風有未殄者非庶希憲不能鎮撫中外右丞

相史公以聞允焉未刻復入見平章王文統請庶希憲

依已議同政不許遂以左丞相耶律鑄代庶赴燕

是日追謚

魏瑞曰靖肅先生當改後從此

四日甲午有旨趣平章王文統南行於是定省府掾屬

去留者是日燕京路宣撫賽音丹珠爾

回紇之有良德者自云世家同中國孔子

宗系累朝為斷事官輕財安民甚有人望後以平章政事終于雲南

真定宣撫劉肅授吏

戶禮三部尚書以上都太倉使宋紹祖邢人郝子明為

郎中益都等路宣撫宋子貞授兵刑工三部尚書以太

醫院官焦仲益李子敬為右三部侍郎

劉前進士自職官勾補省掾北

渡後佐東平幕上聞其有經濟才召治邢州省部之建諸其議論為多

五日乙未左右兩部官望謝恩命於省中都堂為諸投



下招收人戶取索錢債奏奉聖旨諭十道宣撫司今體  
知得諸投下差使臣告奉到聖旨及令旨文字不經由  
本路官司徑直於州縣開讀拘刷民戶人匠便行拘收  
起移及取索錢債騷擾為此特降聖旨今後遇有各投  
下拘刷起移民匠取索錢債先須經由本路宣撫司行  
下達嚕噶齊管民官不係大數民匠合拘刷起移者依  
上拘刷並不得似前徑直於州縣一同搔擾如委實不  
係大數合拘刷起移底民匠各路官司却不得遮當外

據錢債公事不得一同拘收人員取索若委係已身借過錢債照依先降聖旨於宣撫司定奪立限歸還違者並行治罪已刻雷雨大作其驟烈可怖

六日丙申入奏行臺一切事理其旨有云管民官管軍官鷹房打捕諸色造作一切大小公事並聽行省從宜處置申刻宋劉二尚書來謝王相公曰公等皆朝廷遴選謝於私門未敢聞命辭不見

七日丁酉奏准八座職印以白金作三臺鑄造其方寸

皆從品秩有差午刻藏春上人以王相南下令僧逸以良馬二疋來餞陞戶部員外郎王煥為左三部郎中是日加尚書蹇音丹珠司農卿領左部如故從再請也

八日戊戌益都申宋人侵軼連水與戰敗之是日追謚前經義狀元李俊民為莊靜先生云云先生字用章獲澤人明昌間進士道號鶴鳴老人在河南時於隱士荆先生傳皇極數學己未間聖上在潛令張仲一就問禎祥優禮有加至是先生已歿其言盡徵故有是命以旌其

德學云初張辭去田繼請以蒲輪來起公先生笑不荅  
贈詩以見方來其辭曰丹鳳啣書下九霄山城和氣動  
民謠久潜龍虎聲相應未戮鯨鯢氣尚驕萬里江山歸  
一統百年人事見清朝天教老眼觀新化白髮那堪不  
肯饒明年正月先生卒於家愚觀其遺書所得蓋康節  
之傳云嘗與劉尚書才卿講究楚黃故事劉曰間嘗聞  
之高士美云其勅之全式尚書省牒故某官某職某人  
牒奉勅可追謚某名牒至准勅故牒年月日後備具相

卿圓押其勅封上題給付某人第其子孫錄全文如式  
火於本官家廟以告謂之焚黃

九日未刻右丞相布哈來約王相行期平章以行臺未  
辦事同丞相赴省議決申刻右相不花入朝見焉陳邃  
授濱棣勸農使陳君錫大名宰懷州劉淵西京

十日庚子諸相座省劉尚書議部官署押事王相為裁  
定焉辰刻得宋荆湖制使與右相史公書并公文所贈  
遺禮楊時宋景定二年也具其事以聞是日高麗世子

植來朝詔館於都東郊官舍從行者一十八人選筆且

齊太原張大本

字仲端

美丰儀辯而有文采為館伴焉繼

命翰林承旨王鶚郎中焦飛卿犒慰有詔翼日都省官  
與高麗使人每就省中戲劇者

十一日辛丑都堂置酒宴世子植等於西署其押燕者  
右丞相史公左丞相和爾布哈王平章張右丞張左丞  
楊參政姚宣撫賈郎中高聖舉從西榻南頭至東北作  
曲肘座掌記王惲通譯事李顯祖皆地座西嚮其高麗

世子與參政李藏用

字顯甫

尚書李翰林直學士南榻座

亦西嚮又有龍舒院書狀等官凡六人尚書以下三人皆襪而登席相次地座酒數行語既不通其問荅各以書相示丞相史公首問曰汝國海中所臣者凡幾處軍旅有無見征戍者掌兵者何人官號何名參政李藏用對曰掌兵者金氏史曰豈復猶以默哩齊為名乎曰此名廢去已久其官亦皆帶樞府兵部之號史曰聞汝國亦嘗與宋人通好然乎曰但商舶往來耳平章王曰汝

國今歲亦收成曰仰賴聖恩雨暘時若溥霑豐稔又曰  
間汝國用宋人正朔然乎曰第商人私有齎至本方者  
實不為用耳參政楊公曰聞汝邦亦設科舉曰然曰今  
歲試題為何曰賦則某題論則西門豹為政其炎如火  
詩則天砥礪兆民也又曰除詩賦策論外科名極多如經  
學陰陽醫方武舉算學之類皆是也宣撫姚公曰傳聞  
汝邦有古文尚書及海外異書曰與中國書不殊又曰  
間聖上近賜餼牽想已饜飫曰悉亡之矣曰博塞亡之



乎讀書亡之乎曰博塞亡之矣遂哄堂大笑左丞張公  
問曰汝國王世系說是世臣胄裔曰非也其來是唐順  
宗第十三子逃難而立於此以王家後易姓為王時李  
參政手持玳瑁聚宴史相曰執政官當以端方表德今  
所用非方非圓或聚或散何居李不能荅有頃即以葛  
藤語亂之實飾辭也其世子與李參政衣白縠上衽袍  
冠則漆紗圓頂巾履舄皆以絛為之帶則烏犀小革也  
其李顯甫面滿月白皙鬚髮皓然年十八以詞賦狀元

第時六十一歲通禪學善作詩蓋世子之岳翁也酉刻  
皆霑醉而去其導從儀物張蓋乘馬馬首復持一大紫  
蓋比常蓋四垂極長問之曰引蓋也名曰儀則明日諸  
相入見上聞燕語甚歡遂以手詔王帶遣還制詞有云  
出水而陸去危就安宜寬漢法之拘續議楚宮之作蓋  
准元年先奏便民之請也至元七年朝廷遣平章趙璧  
郎中宋道字弘道終太子賓客徙王都於海西岸江華島一炬為  
焦土矣

十二日壬戌辰刻耶律中書張左丞傳旨今後應奉朝  
旨如無御寶并印信文字不得輒行未刻王相陞辭皇  
后及皇太子於青宮太子慰獎甚厚有元老克壯謀猷  
之諭申刻復入朝遂陞辭焉遂出自南門郊餞者廉平  
章楊參政賈郎中及留冬諸掾屬比至南平藏春令左  
右迎候於道者踵相接也上人待遇甚恭極賓主之禮  
十三日癸亥辰刻齋畢而去

十四日甲子藏春來自南菴午刻會食史相行館寥休

以灑墨王孟皐贈公及觀所作玉鏡命諸公賦詩西菴  
有幸自得辭塗抹手照人毋用太分明之句仲晦為欣  
然也

十五日乙丑欲移寓太儀使王儀之館舍史公不許令  
與參議納合君同寢處者四十餘日時憚管陳言文字  
就命日左右楊相權供中舍之職

十六日丙寅詔封保定張柔為安肅公制辭曰大夫當  
七十之後致仕則宜國家列五等之封攷勛而授張某

功成百戰眷荷累朝方深補袞之思遽有懸車之請宜疏  
上爵用荅元勛可特封某公致仕事業一時宜使古今之  
獲寵子孫後世要知忠義之可為宜保永年以全耆德  
濟南張榮為濟南公其詞曰大夫謝事得進退之宜國  
家定封明始終之義某官功高舊德教備義方方深分  
閫之期遽有懸車之請宜疏上爵以示殊恩可特封某  
公致仕廣及子孫常保山河之世名垂竹帛永為忠義  
之門頤養遐齡保全耆德

十八日戊辰權中省都事趙謙得腦瘍極熾憚與楊都司誠之求療於太醫王儀之遂以真定麻澤民與視凡三往諾焉踵及門中使促而去之自是澤民內侍不得出者旬日趙之疾遂無及矣攜一僕既老而癡時臭惡聞戶外予絮兩鼻孔為湯藥之夜則對榻而卧伺其緩急義之所激曾弗之倦

十九日己巳堂議選中省兩司都事遂以左司授憚此出史楊二公雅意辭曰據某何人過蒙擢用得文翰職

足矣

廿五日甲戌都堂奉旨諭各路宣撫司宣聖廟國家歲時致祭如月朔釋奠宜恒令洒掃修潔今後禁約諸官員使臣車馬毋得於廟宇內安下或聚集理問詞訟及褻瀆飲宴管工匠官不得於其中營造違者治罪管內凡有書院亦不得令諸人搔擾使臣安下

廿七日丙子都堂奉旨夫五岳之中恒屬其一豐阜峻極作鎮北土爰古迄今祀典存焉粵自國朝開創以來

祠祭之禮亦未嘗闕其岳廟中今後仰過往使臣軍馬  
毋得安下騷擾毀折樹木及不得於看廟人處奪要鋪  
頭口仍仰常切修葺毋致疎荒

廿八日丁丑都堂奏奉聖旨道與真定路宣撫司據懷  
孟達嚕噶齊默爾奇總管覃澄奏告管下地分多有屯  
住蒙古頭目遇有關涉詞訟公事不肯前來對證往往  
不伏勾追以致遲滯公事准奏仰遍諭諸路宣撫司今  
後各州城管民官遇有關涉蒙古軍人公事理問時分



管軍官一員一同聽斷施行毋得偏向准此

秋七月丙申辛酉朔前河東宣撫使張公以怨家有言去留維谷是日得行省詔保及史相濶左丞互為申理奏准充行中書省參議方得解去良不易也嗚呼天道冥冥報施其間令人有可疑者今張以正獲罪然聖人所事不為過甚公豈犯此忌耶可不戒之哉其宣辭云張德輝宅心剛正處事精明及居風憲之司遂有澄清之志巨猾望風而屏迹疲民受賜以到今不示顯膺何

彰獨立可特授翰林學士參議行中書省事尚資婉畫  
庶底成功

十七日丁丑大司農左三部尚書賽音丹珠改授平章政  
事制辭曰兩朝眷遇凡事精勤常辦集於軍前能經營  
於意外欲旌成績宜處台司當奉至公用遵大體盡爾  
贊襄之力副予委任之誠至於辦集經營當時論者謂  
於公甚為切當公遂置酒重以潤筆為荅惲謝不敏  
十八日戊寅翰林國史院保雷膺與惲充本院屬官

十九日己卯舒穆魯綱噶達授右三部尚書制詞曰望高  
門第業不墜於箕裘身侍禁闥勞久服於歲月宜分膺  
於三部俾庸列於六卿可特授某官當副朕心毋瘵厥  
職

廿日庚辰行省諮者數事都堂議有可否史公曰雖分  
兩省其實一也若非關利害者不宜妄有阻駁使王事  
成就可也今後凡行省所諮須三日內咨報自是上下  
云為如流水之源矣予當時歎賞以為不多得也

廿一日辛巳有旨世臣邁珠孩兒

托哈太傳姓耶律氏在前金時戍桓州官

阿勒達漢語守戍長也其後與一十八人從太極神元皇帝同飲於黑河子於佐命元勲公其一也買住即太傳第二子早卒其子明安岱爾時年十有三歲今衛輝路總管耶律哈濟即其兄也聖旨宣諭了

也教省家與文書去者其制詞曰我家當開拓之初乃祖有經營之力人今不見功豈可忘雖爾身未及成人  
在朕心忍令無後姑承舊爵用顯元勲直須長立之年  
許領職司之務

廿二日庫庫學士授中書左丞庫庫字子清時年三十

九歲嘗受學於王百一張耀卿其父潜邸舊臣世為克塔齊漢語羣牧所官也

廿三日癸未鄭江授侍衛官其詞曰鄭江職在承宣誓從征役跡去易就難之意有忘家憂國之誠不示褒崇何明勸激就帶已降金牌充侍衛軍副都指揮使同判武衛軍事景州軍民長官如故更宜戮力以奏膚功是日有旨與老王姑護持玉華宮聖旨者其詞曰煉師王道婦賦性純正執志不回挺挺然有古烈婦之風奉侍

我太上皇皇太后積有年矣周旋之間曾無過舉當時  
雅為敬重使之入道為此先帝常加賜予已勅令真定  
管民官選擇佳地起蓋宮觀資給衣糧仍以玉華之名  
賜之以為我家祈福之地朝夕焚誦用報我皇考妣罔  
極之恩所在有司宜加持護毋容他人妄相侵奪毋以  
差役相毒以致不安常教告天與皇家子孫祝延福壽  
准此

廿五日乙酉權中省都事趙謙終於上都客舍憚為棺

斂并封視隨行衣裝請於郎中賈君仲明蒙賻錢千五百緡

廿六日丙午遣送趙君焚於都城東十里外回適趙氏親知徐總管者至其僕與所封裝篋付焉

三十日庚戌時前軍儲所官塔塔爾岱爾摩和納錫喇筆且齊馬雅爾噶鵒等爭相為用丞相史公與庫左丞議曰今南邊極遠江淮又不用兵所事宜廢至於異時征進一行部官可辨既而中止特旨以前都運周惠子錯領

其事

七月廿七日丁亥前大名路宣撫使幕官雷膺前東平  
路宣撫司同議權詳定官王惲同日授翰林修撰雷詞  
頭云家學有傳士行無玷昔年詩禮已聞鯉過於庭階  
今日絲綸復見鳳毛於池上可特授某官同知制誥兼  
國史院編修官宜振斯文以弼予治王詞頭云行已無  
忝博學能文顧超絕之逸材足鋪張於偉績宜司綸命  
以贊皇猷可特授某官同知制誥兼國史院編修官當



振斯文以宣朕命承旨笑謂膺等曰汝二人可謂佛子出世矣憚等謝不敏既而奏准行翰林院事中省既以院印授承旨公因與憚議曰前朝士人無幾若比老使得需一命儘有光矣遂保奏廿餘人擬為隨路提舉學校官是日有詔照會立翰林國史院道與翰林承旨王鶚據保奏翰林院官修國史事准奏收拾者在這裏底先與職名者外未到人員候來時定奪今開坐元保人數并已除翰林院官職名如後

一已除

翰林學士承旨兼修國史王鶚

翰林侍讀學士郝經差充國信使

翰林侍講學士李昶兼同議東平路軍民事

翰林學士知制誥同修國史李冶

翰林修撰同知制誥兼充國史院編修官雷膺王

惲

一未除見收拾

王磐直學士

圖克坦公履待制

孟攀麟待制

宋思誠修撰

胡祇適應奉

右仰照會收拾者准此

承旨王公字百一曹州東明人知人榜詞賦狀元皇帝  
在潛時首以禮幣徵焉以老儒故上甚敬重每見以狀  
元呼之以元年七月受是職公上章言修史事云自古  
國亡而史不亡唐取隋史焉宋取五代亦然金不為遼

作史至今天下有遺恨我國家以神武定四方皆太祖  
聖武皇帝廟謨雄斷所致若不乘時紀錄以詔萬世切  
恐歲久漸至遺亡又舉前朝名筆數人於是上特降是  
詔焉

廿八日戊子丞相史公遣修撰雷膺送安肅濟南二國  
公誥命公曰若所有潤禮汝二新人中受之且代光院  
之贈

廿九日己丑申刻丞相史公卧閣中前行部馬雅噶爾密

來謁辭不見曰若公務當於都省相見

秋八月丁酉辛卯朔徵君許衡授懷孟路教官制曰許衡天資雅厚經學精專大凡講論之間深得聖賢之奧受罰者恐陳君所短為盜者畏王烈之知所在向風真堪正俗可令於懷孟等處選揀子弟俊秀者舉歸教育取作範模再令董子帷前有傳授之子弟重使王通門下皆經濟之名臣勿喪斯文以弼予治

竇傑授太子少傅制曰德全天懿學得聖傳文章足以

徽帝猷言行足以為世範屬周世本支之盛要漢家羽翼之成宜導春宮用嚴師訓可特授太子少傳早為諭教當自誠心左右前後皆正人宜公所選干戈羽籥在

東序行見其儀

以上二篇皆楊公西菴筆也

宣撫姚樞授太子少傳制詞曰姚樞天彛素厚聖學有傳能全踐履之功發自誠明之性養成耆德無非禮樂詩書當侍春宮爰置左右前後可特授某官要明早諭以贊元良用傳震索之祥得繼離明之照

二日壬辰奉旨諸路學校久廢無以作成人材今擬選博學洽聞之士以教導之凡諸生進修者仍選高業儒生教授嚴加訓誨務要成材以備他日選擢之用仍仰各路官司常加主領敦勸隨頒降從六品印信勾當

癸巳摠帥汪某授鞏昌路便宜都帥其制曰某官勲高再世勇冠諸軍向因犯順之徒遽起稱兵之釁賴茲戮力殲厥渠魁及當來覲之時殊乏自矜之色觀其誠赤深可尚嘉就帶已降虎符可授鞏昌路同簽便宜都摠

帥事宜盡贊毘以裨遺逸垂功名於千載萃忠義於一門尚副朕懷以固吾圉

甲午奏遣宣使王好禮閱鄧州軍實仍送萬戶史權改授江淮大都宣命乃獎諭軍將等詔其辭曰朕即位之初深以戢兵為念故前年遣使於宋以通和好宋人不務遠圖伺我小隙反起邊釁東剽西掠曾無寧日朕自還宮諸大臣皆以舉兵南伐為請朕重憫兩國生靈之故猶待信使還歸庶有悛心以成和議留而不至今已



一載往來之禮遽絕侵擾之暴不已彼嘗以衣冠禮樂  
自居理當如是乎曲直之分灼然可見今遣使往諭卿  
等當整爾士卒礪爾戈矛矯爾弓矢約會諸軍秋高馬  
肥水陸分道而進以為問罪之舉尚賴祖宗社稷之靈  
其克有勲卿等當宣朕命明諭將士各當自勉予其大  
賚汝仰下項把軍頭目毋替朕命

四日乙未前奉使賀某復授宣諭大理國使其詞曰賀  
某幼懷奇節筮仕昌時及知遇於先朝遂撫綏於大理

揚威絕域昔收定遠之功服事彤庭屢抗伏波之請宜  
旌前効俾煥綸章汝其宣暢皇猷洋溢方外爰體綏懷  
之意以安遐邇之情轉為招徠式副所託

五日乙亥承旨命惲與某同撰釋奠諸文某人所撰中  
涉議論公曰文自有體此等文字皆是贊頌功德不當  
如是徐莞爾曰不知謂我云何至於散文亦有三說入  
作須若虎首取其猛而重也中如豕腹取其釀而多也  
末同薑尾取其臨出螫而毒也此雖常談亦可為之法

也

六日丙申詔追謚真定五路萬戶府參謀李大

闕

肅

蔡州破將被戮萬戶史侯  
救免之撫治真定有法

其詞曰政書仕籍聲

振諫垣至於今代以有為方之古人而無愧適將擢用  
遽不憖遺既垂顯異於生前忍使湮沒於身後宜錫如  
綸之命用增拱木之光可謚曰貞肅魂其有知歆此無  
斁又同日復追謚前監察御史中庸先生張特立其詞  
曰學有淵源行無玷缺雖經喪亂不改故常向潛邸之

升聞降璽書而褒重未遂丘園之貴俄興窆窀之悲宜  
煥絲綸用光泉壤可依前號中庸英靈如在寵數其知  
又復追謚故徵君魏璠恬退自如剛毅有守常謂生前  
之不達忍令死后之無聞宜定嘉名以光後裔可謚曰  
靖肅

先生名璠字邦彥金貞祐初詞賦進士第道號一峯  
老人正大末以修撰使武仙不屈大元庚戌上徵至  
潛邸條陳三十餘事如定官號頒俸祿功罪有賞罰

能否有升降署治天下之急務又曰農桑天下之大  
本不可不重是故明君重五穀而賤金玉告訐之俗  
興罰及無辜僥倖之門啟官及不善漢之常平宋之  
講筵萬世可常行也又薦中州名士大夫六七十人  
今之施為多出先生餘論也今曾孫必復已為翰林  
修撰

七日丁酉許教官衡改授國子祭酒其辭曰懿德素全經學  
洞貫視聽言動皆合禮宜進退周旋舉皆中道所在滿禦

寇之屢疇非趨董子之帷宜處成均以全樂育可特授  
某官務講明於聖道為矜式於國人

八日戊戌太傅姚樞改授大司農其詞曰學明經旨德  
備天彛由本郎而知名從王師而伐罪黽勉從事於今  
有年可改授某職務要克謹農時一遵詔旨民舉緣於  
南畝歲有望於西成庸厚民生以彊國本

九日己亥鄭汝翼授大理寺丞其詞曰某官法律深明  
臺寺徧歷常謹少恩之戒共推斷獄之平任此舊人弼

予新政可特授某官宜在簿書之際更詳朱墨之工

十日庚子賜高麗國王餽手詔時值權臣金氏之變其  
辭曰世居東土封自西周中國之姓雖更外邦之貴不  
闕向以權臣之專寵至於隻矢以相加卿慨發純誠來  
修覲禮敬形於色濟濟然殊可觀情見乎辭謙謙而不  
自伐宜還舊服往紹新休可封高麗國王仍統治東方  
諸國如故尚服寵光益加奮勵

十一日辛丑徵君李治

字仁卿藥城人前進士初公徵  
至詢以時事但以真定木場抽

分官錢修蓋文廟而已道號敬齋

授翰林學士制詞曰某官秀擢巍科

力窮聖學據縱橫之文筆足潤色於皇猷况當青史之編宜與玉堂之選可特授某官知制誥庶得腹心之助以光綸綍之司

十二日壬寅劉秉恕授中書吏部侍郎其詞曰家學有傳天資素厚向處副車之地已全製錦之功榮示褒崇以明勸獎可特降金牌授某職兼邢州安撫使往膺朕命毋廢攸司儻中心不異於此時豈後寵反薄於今日



十三日癸卯太醫王儀之授太醫院判兼教授其詞曰  
歷學精高儒術通貫肱不待於三折術已底於丕全久  
侍禁闥共推耆德可授某官勾當尚傳素業用授諸生

儀之林慮人沉靜有議論  
每有所陳裨益時政甚多

十四日甲辰賜劉元帥手詔兼宣諭夔府路新附軍民  
人等其詞曰且土地定其疆固有朔南之異而父母愛  
其子曾何彼此之分朕嘗以四海為家萬方在已凡有  
來賓之俗敢忘同視之仁近因宋國之未臣遂致蜀川

之重擾彼軍旅焉老淹於屯戍彼民人焉力盡於轉輸  
况值凶荒舉皆轉徙保聚山麓者延生於歲月潛匿澤  
藪者橫死於風霜彼君有昧於天時在朕心亦有其慙  
德今茲劉整慕我國朝既能順德而來當副徯蘇之望  
市肆勿異田里俾安爾有貨財毋令剗掠爾有禾稼罔  
使踐傷諸回回通事人等逃在彼軍者許令自還為良  
不屬舊主除已行下陝西行省常加存恤不使侵攘外  
今降金牌五銀牌十以旌有功者當續具姓名頒降宣

命凡在軍民各寧處所故茲詔示想宜知悉

十五日乙巳董文炳授親衛軍都指揮使其詞曰某官性秉忠貞才堪任使積年事上不違咫尺之天今日定封當處爪牙之地可特降虎符授親衛軍都指揮使同簽武衛軍事尚嚴宿衛益効勤勞用副朕心以成爾績十六日丙午宣諭歸附段實曰向率我師往臨爾境重拒國人之請以從城下之盟款附而來忠勤益著庸示至優之渥以彰同視之仁尚修前効無負初心撫安已

附之民招集未降之衆國典有常卿其勉之

十七日丁未宣諭青居山帥臣某官爰從變故明審事  
機攜赤子以來歸保青居而不失要明實志屢立戰功  
儻不示於寵章何以旌其忠懇用錫虎符之命以彰鴻  
渥之殊餘如故尚盡乃心無瘵厥職儻忠心不異於始  
豈後賞反薄於前

前通許屯田萬戶宋朴

字文卿

授某路勸農官其詞有天

資忠懇儒學專精昔蘭省之荷橐久勤王事近柳營之

積穀大備兵儲宜崇褒獎之恩以盡始終之義

其弟宋彰

字壽甫

屯田府諮議其詞曰明切事機用輸誠

款能釋樂成之業以明懷德之心宜示褒崇取為勸激  
可充鄧州屯田總管下諮議兼招撫未降軍民勾當更

當自勉期有成勲

終押州總管

邢州張安撫耕

字耘夫真定靈壽人年二十用資入仕以名臣子補俸職至元癸丑授邢州安

撫使至是超拜以施治效為人長身白晳氣貌沈厚犯而不校

改授吏部尚書其詞曰

德備忠純材優經濟及試臨民之職首馳報政之聲保

安全於久廢之餘集流亡於四散之後以茲明效宜示  
寵章可超受吏部尚書兼前職仍易虎符以昭鴻渥往  
膺朕命恪守攸司

十八日戊申奉旨頒降中統權宜條理詔

參政楊公筆也

制曰

事匪前定無以啟臣民視聽不惑之心政豈徒為必當  
舉帝王坦白可行之制我國家以戎旌而開建於禁網  
則濶疎雖嘗有所施行未免涉於簡略或得於此而失  
於彼或輕於昔而重於今以茲奸猾之徒得以上下其

手朕惟欽恤期底寬平迺姑立於九章用頒行於十道  
比成國典量示權宜務要遵行毋輕變易據五刑之中  
流罪一條似未可用除犯死刑者依條處置外徒年杖  
數今擬遞減一等決杖雖多不過一百七下著為定例  
揭示多方

開條云云

嗚呼六計周官所以蔽羣吏之治三章漢法所以慰百  
姓之心詳酌舊規著為新制惟上令昭垂如日月則下

情易避如江河雖曰從輕期於不犯咨爾有衆體予至懷故茲詔示想宜知悉

十九日巳酉辰刻同雷彥正游宣撫子明

平章政事

赴南平

山辭藏春上人時入壇不克見游於菴門外大呼曰師父顯等謹來拜辭時丞相史公第四子扛侍上人於此遂置酒相別比回朔風振野吹砂礫射人殆勁矢然寒已不可勝矣

廿日庚戌詣都堂辭諸相南歸



廿一日辛亥辰刻由都西門出是夜宿桓州

廿二壬子抵舊桓州

廿三日癸丑前次半羣頭取直東南下崖嶺夜半宿山南農家明日甲寅宿雲州張繼先家

廿五日乙卯自望雲泐龍門河南行入寒山峪遇大雨  
憇寒山遇鋪午霽渡泥澗人馬縋而下挽而上登靖邊  
北嶺有虎哭起澗東嘯而去人馬為辟易投宿碧落崖  
下崖峻絕方廣如画屏然泉流縈帶環山根一匝秋稼

已熟黃雲滿川蓋朔方之武陵溪也

廿六日丙辰下十八骨了泥滑不能騎比至平地僕馬  
為痛矣行約兩舍抵田家止宿

廿七日丁巳宿北口小店明日踰灰嶺試桃花峪溫湯  
山間殊有奇觀石為盤渦如碧玉盆者非一壽藤灌木  
交陰左右其水泉蓋潞河之上源也是晚宿新店又二  
日至燕粵自中元九月奉檄北上至是年辛酉九月凡  
十有三月實歷三百八十四日

秋澗集卷八十二